

YANGI O‘ZBEKISTON



IKKI DAVLAT MUDOFAA IDORALARI HAMKORLIGI YANADA MUSTAHKAMLANADI

O‘zbekiston Respublikasi Prezidenti Shavkat Mirziyoyev 22-yanvar kuni mamlakatimizda tashrif bilan bo‘lib turgan Rossiya Federatsiyasi mudofaa vaziri Andrey Belousovni qabul qildi.



Uchrashuv avvalida Rossiya mudofaa idorasi rahbari O‘zbekiston yetakchisiga Rossiya Federatsiyasi Prezidenti Vladimir Putinning salomi va eng ezgu tilaklarini yetkazdi.

O‘zbekiston — Rossiya keng qamrovli strategik sheriklik va ittifoqchilik munosabatlarini Rossiya Federatsiyasi Prezidentining 2024-yil may oyida O‘zbekiston Respublikasiga davlat tashrifi chog‘ida erishilgan kelishuvlarni amalga oshirish nuqtayi nazaridan yanada rivojlantirish va mustahkamlash masalalari ko‘rib chiqildi.

Qabul qilingan dasturiy va reja hujjatlariga muvofiq, ikki mamlakat mudofaa idoralari hamkorligini kengaytirish muhimligi qayd etildi.

O‘ZA

**O‘zbekiston Respublikasi
Prezidenti
Matbuot xizmati surati.**

OLIV TA’LIM VA ILM-FAN – MAMLAKAT TARAQQIYOTI TAYANCHI

Prezident Shavkat Mirziyoyev oliy ta’lim va ilm-fan sohasidagi ustuvor vazifalarga oid taqdimot bilan tanishdi.

Mamlakatimiz taraqqiyotining tayanchi sifatida bu yo‘nalishlarga katta e’tibor qaratilmoqda. Yangi oliyog‘ohlar ochilib, qamrov ancha kengaydi. Ta’lim jarayonlari sifat jihatidan yaxshilanmoqda.

O‘tgan yili bakalavriat yo‘nalishlari ma’qullashirilib, 1 ming 200 dan ortiq ta’lim dasturlari xorijiy andozalarga moslashtirildi. Jumladan, bitiruvchilarga malaka talabi to‘liq yangilandi, qayta tiklanuvchi energiya manbalari, atrof-muhit muhandisligi, biotizimlar muhandisligi kabi zamonaviy yo‘nalishlar ochildi.

Bu yil ham qator muhim vazifalar belgilandi. Xususan, yana mingdan ortiq ta’lim dasturlari “TOP-300” universitet dasturlari asosida takomillashtiriladi. 45 ta ta’lim dasturlari xalqaro akkreditatsiyadan o‘tkazildi. Oliyog‘ohlarda Registrator ofisi xizmatlari bilan talabalar to‘liq qamrab olinadi. Dual ta’limga yana 50 ming talaba jalb qilinadi.

Oliy ta’limda ilmiy salohiyatni 55 foizga chiqarish, xorijda 5 ming nafar pedagog malakasini oshirish rejalashtirilgan. Ilg‘or muhandislik maktablarini 25 taga yetkazib, sanoat korxonalarini bilan loyihalar qiymatini 10 barobar oshirish maqsad qilingan.

Taqdimotda mutasaddilar shu borada amalga oshiriladigan ishlar haqida axborot berdi.

Ma’lumki, oliy ta’limga qabul jarayonida “avval test, keyin tanlov” tamoyiliga o‘tili. Davlat granti talabalarning iqtidoriga qarab ajratiladigan bo‘ladi. Moliyaviy mustaqillik berilgan 40 ta oliyog‘ohda Registrator ofisi tashkil qilindi. Natijada dekanat va bo‘limlarda shtatlar 20 foizga qisqarib, 30 ta xizmat turi raqamlashti.

Ushbu tajribadan kelib chiqib, shunday ofislarni boshqa oliy o‘quv yurtlarida ham ochish, ta’lim va ilm-fan xizmatlarini qamrab olgan yagona raqamli tizim joriy etish bo‘yicha ko‘rsatmalar berildi.

Amaliyot bilan uyg‘unlikni kuchaytirish maqsadida dual ta’lim yo‘liga qo‘yilmoqda. Hozirda 15 ming talaba 957 ta korxonaga

biriktirilgan. Lekin korxonalarda bunga qiziqish kam. Shu bois, dual ta’limda ishtirok etayotgan korxonalarni rag‘batlantirish bo‘yicha tashabbuslar bildirildi.

2024-yil 20-iyunda bo‘lib o‘tgan videoselektor yig‘ilishida davlatimiz rahbari har bir hududda texnika oliyog‘ohi va ilg‘or muhandislik maktablari tashkil qilish vazifasini qo‘ygan edi. Hozirgacha Termiz, Andijon va Qashg‘arda texnika universitetlari faoliyati yo‘lga qo‘yildi. Shuningdek, 8 ta muhandislik maktabi ochildi.

Yig‘ilishda Nukus, Buxoro, Farg‘ona va Namangan texnika universitetlarini tashkil etish loyihalari taqdimot qilindi. Unga ko‘ra, yangi yo‘nalishlar ochilib, xorijiy dasturlar tatbiq qilinadi, talabalarning ilmiy-innovatsion jarayonlarda ishtiroki kengaytiriladi, oliyog‘ohlarga sanoat hamkorlari biriktiriladi.

Umuman, bu yo‘nalishdagi 35 ta muassasani yiriklashtirish hisobiga 22 ta texnika universiteti tashkil qilinadi. Shu yil oxirigacha yana 17 ta muhandislik maktabi ochildi.

So‘nggi yillarda oliy o‘quv yurtlarida ilmiy salohiyat 41 foizdan 45 foizga oshgan. Lekin aksariyat ilmiy tadqiqotlar sanoat va ishlab chiqarishdagi zamonaviy tendensiyalarni qamrab olmayapti.

Shu bois, doktorantura kvotasini taqsimlashda iqtisodiyotning drayver sohalariga ahamiyat qaratish, ilmiy daraja va unvonlar olish tartibini takomillashtirish bo‘yicha ko‘rsatmalar berildi. Pedagoglar kasbiy mahoratini oshirishni yangi bosqichga olib chiqish zarurligi ta’kidlandi.

Yoshlar tarbiyasida axloq va sport ham muhim. Bu borada “Besh tashabbus”, “Ma’rifat ulashib”, “Talabalarda sport ligasi”, “Zakovat” kabi harakatlar yo‘lga qo‘yilgan. Bunday ma’naviy-ma’rifiy, sport va intellektual loyihalar bilan talabalarni to‘liq qamrab olish, yoshlarda vatanparvarlik ruhini kuchaytirish tadbirlari yuzasidan axborot berildi.

O‘ZA

O‘zbekiston Respublikasi Prezidentining FARMONI

E.O. TURDIMOVNI SIRDARYO VILOYATI HOKIMI VAZIFASINI BAJARUVCHI ETIB TAYINLASH TO‘G‘RISIDA

O‘zbekiston Respublikasi Konstitutsiyasining 109-moddasi 15-bandi va 124-moddasiga muvofiq, **Erkinjon Oqbutayevich Turdimov** Sirdaryo viloyati hokimi vazifasini bajaruvchi etib tayinlansin.

O‘zbekiston Respublikasi Prezidenti

Sh. MIRZIYOYEV

Toshkent shahri,
2025-yil 21-yanvar

Mulohaza va taklif
“YASHIL” BELBOG‘LAR
ULARNI BUGUN YARATISHIMIZ KERAK, ERTAGA KECH BO‘LADI

Yer yuzida aholi soni ko‘payishi qator demografik muammolarni keltirib chiqardi, xususan, global isishga olib keldi. Bugun dunyo bo‘ylab havo harorati 1,5 daraja ko‘tarilgani kuzatilmog‘da. Shuningdek, qanchadan qancha unumdor maydonlar degradatsiyaga uchrab, ekin ekishga yaroqsiz holga keldi. Chuchuk suv tanqisligi dunyo bo‘ylab sezilmog‘da, tuproq sho‘rlanmog‘da. Aholi oziq-ovqat tanqisligiga duch kelmog‘da. Muzliklar erib, yer ostidagi qazilma boyliklar, energiya manbalari kun sayin kamayib, ayrimlari tugab borayotgani ham haqiqat.


Davomi 3-betda

Prezident tashabbusi amalda

SAYXUNOBOD TAJRIBASI:

TOMORQACHILIK ORTIDAN RIVOJLANAYOTGAN HUDUD NAMUNAGA AYLANDI

Mamlakatimizdagi islohotlar butun mazmun-mohiyati, maqsad-muddaoi bilan “Inson qadri uchun” tamoyili ro‘yobiga asoslangan. O‘tgan qisqa muddatda bu tamoyilga tayanib qilingan ishlar samarasini har bir soha, har bir jabhada ro‘y berayotgan o‘zgarishlarda ko‘rib, bilib turibmiz.



Keyingi yetti-sakkiz yildagi yangilanishlarga nazar tashlasak, fikrimizni tasdiqlovchi juda ko‘p misollar keltirish mumkin. Aytaylik, bugun mahallamizda ilgari bo‘lmagan tadbirkorlik subyektlari vujudga kelmoqda. Buning ortidan yon-atrofimizdagi ishshizlar ishi bo‘lyapti. Natijada ro‘zg‘origa baraka kirib, hayoti yanada fayzli bo‘lib borayotir.

Yana qaysidir hududda tomorqachilik rivojlanmoqda. Bir parcha tomorqasida mehnat qilib, shuning ortidan uy ko‘tarayotganlar, to‘y qilyotganlar qancha! Bundan ruhanib, yerga mehr berayotganlar-chi? Eng muhimi, ularning tashabbusi, g‘oyasi davlat tomonidan qo‘llab-quvvatlanmoqda. Ishlash, mehnat qilish uchun zarur barcha sharoitlar yaratib berilyapti.

Prezidentimiz tashabbusi bilan ommalashtirilayotgan to‘rt hudud tajribasi odamlarga ana shunday imkoniyatni taqdim etmoqda. Aholini daromadli, ishli qilib, tadbirkorlikka undamoqda.

Jumladan, Sayxunobod tajribasi tomorqadan ununim foydalanish orqali yaxshi daromad ko‘rishni ko‘zlasa, Uychi tajribasida tadbirkorlar va biznes bilan shug‘ullanish istagidagilar bilan manzilli ishlar tizimi yaratilgan. G‘ijduvon

tajribasida mahallada vertikal o‘sadigan sanoat binolari tashkil qilinib, ularida xonadonlarda yo‘lga qo‘yilgan, lekin kengayish imkonini bo‘lmagan ishlab chiqarish uchun sharoit yaratilyapti. Tuman darajasida katta loyihalarni amalga oshirishga qaratilgan Zarbdor tajribasi asosida esa sanoat, savdo, xizmat va zamonaviy agrotexnologiyalar yo‘nalishida drayver loyiha ishlab chiqilishi yo‘lga qo‘yildi.

Odamlarni band, xonadonlarni daromadli qilish, kambag‘allikni kamaytirishga qaratilgan mazkur tajribalar amaliyotga tatbiq etilganiga uncha ko‘p vaqt bo‘lmadi. Shunga qaramay, ular bugun ancha ommalashdi. Odamlar, tadbirkorlar tajribalar ahamiyatini anglab yetdi. Nafaqat tushunib yetdi, balki ushbu yo‘nalishlarda amaliy ishlarini boshlab yuborganlar ham talaygina.

Shu bois, “Yangi O‘zbekiston” gazetasida ushbu tajribalar samarasini o‘z hayoti misolida his etayotgan yurtdoshlarimiz faoliyati haqida turkum maqolalar berib borishga qaror qildik. Gazetamizning bugungi sanadan joy olgan maqolalar Sayxunobod tajribasiga bag‘ishlanadi.

Tahririyat

4,5-sahifada o‘qing.

TAJIRIBASI:

HUDUD NAMUNAGA AYLANDI



XONADON EGALARI — TADBIRKOR

Sayxunobod tajribasi doirasidagi ishlar tomorqadan foydalanish samaradorligini oshirishni odamlarga tushuntirishdan boshlangani bejiz emas. Chunki mahsulot yetishtirishning ham yo'l-yo'rig'i bor, yaxshi daromad olish uchun dehqonchilik ko'nikmasini egallash bilan birga bozor talabiga moslashish kerak. Mahallalarga birlashtirilgan agronomlar har bir oilaning qiziqish, imkoniyatlaridan kelib chiqib, daromad keltiradigan mahsulotlarni yetishtirishni tavsiya qiladi. Tomorqa va issiqxonalar sabzavotlardan pomidor, bulg'or qalampiri, ko'katlar ekila boshlandi. Ochiq maydonlarda piyoz yetishtirilyapti. Hatto issiqxonada sabzi, tomorqalarda eksportbop oshqovoq yetishtirish boshlandi.



Qizig'i, hududda oshqovoq juda yaxshi hosil berar ekan. Cho'l zona bo'lishiga qaramay, Sayxunobodning yeri oshqovoqqa rosa mos keldi. Tumanning 19 ta mahallasidagi kam ta'minlangan oilalarga tegishli bo'lgan jami 300 gektar tomorqa yer maydoniga "amerika gantel" navli eksportbop oshqovoq ekildi. Mahsulot kutilganidan erta yetilib, mavsumda 3 ming tonnadan ortiq hosil olindi. Eksportchi korxonalarining o'zi aholidan mahsulotni sotib oldi. Oshqovoqning bir qismi mahalliy bozorga chiqarilgan bo'lsa, bir qismi eksport qilingan. Yana katta miqdordagi mahsulot omborxonada saqlanmoqda. Xorijda bu mahsulotga talab katta. Faqat asosiy masala bozor topishda. Kelasi gal mahsulot tayyor bo'lgunga qadar bozorlarni aniqlashtirib olishimiz kerak ekan degan xulosaga keldik. Chunki oshqovoqni uzoq saqlash qiyin, darrov xaridor topish yoki qayta ishlash kerak. Aks holda, dehqon ham, eksportchi ham zarar ko'radi. Shuning uchun avval bozorni aniq qilib olish kerak, yo'qsqa, odamlarni daromad olishga ishontirib bo'lmaydi.

Oshqovoq nafaqat ichki, balki xalqaro bozorda ham xaridor g'ir mahsulot. Sayxunobod sharoitida 1 gektardan 10

tonna hosil olish mumkin. Bunga aholi, xususan, o'zimiz ham guvoh bo'ldim. Ishonsangiz, tomorqamga atigi 7 dona qovoq urug'ini ekkandim. Shundan 140 dona oshqovoq oldim. Ortiqcha xarajati ham, mehnati ham yo'q. Mahalliy aholiga oshqovoq yetishtirish juda ma'qul keldi. Bir fuqaro 10 sotix yerga ekib, 10 million so'm daromad topdi. Shu bois, hududda oshqovoq yetishtirish ham ommalashib boryapti.

Sayxunobod tajribasining o'ziga xosligi ham shunda — har bir ish aniq bilim, tavsiya va imkoniyatlariga asoslanadi. Kreditlar ham faqat maqsadli loyihalarga ajratilyapti. Biror loyiha taklif etildimi, darhol o'rganishga kirishamiz, istiqbolli bo'lsa, qo'llab-quvvatlaymiz. Chunki maqsadsiz olingan kreditlardan, avvalo, odamlarning o'zi zarar ko'radi. Ishi yurishmasa, kreditni ham to'lolmay, qarzga botadi.

2024-yil mart oyiga qadar ushbu tumandagi aholi xonadonlarida 100 ga yaqin issiqxona bo'lgan. Sayxunobod tajribasi yo'lga qo'yilib, tomorqadan samarali foydalanish yo'nalishlari belgilangach, ko'pchilik issiqxonada mahsulot yetishtirishga qiziqish bildirdi. Chunki bunda hosildorlik yuqoriroq bo'ladi, bir mavsum emas, balki yilda 3-4-marta mahsulot yetishtirish mumkin. Birin-ketin issiqxona qurish uchun odamlarga naqd pul shaklida imtiyozli kreditlar ajratilishi boshlandi. Hozirgi kunga kelib, tumanda issiqxonalar soni 800 tadan oshdi.

Muhimi, kredit olgan fuqarolar o'z holiga tashlab qo'yilmaydi. Har biri bilan mahallaga birlashtirilgan agronom ish olib boradi. Issiqxona quruvchi ta'minotchini topishdan tortib, bozor bop mahsulot tanlash, yetishtirish, sotishgacha ko'maklashadi. Qolaversa, fuqarolar yig'inlari tomonidan har bir xonadondagi tomorqada yetishtirilgan mahsulotlar miqdori, ularning sotilishi, aholining daromadlari qat'i yo'z nazoratga olingan. Harakat besamar ketmasligi, olingan mablag' o'zini oqlashiga intilyapmizki, maqsadimiz — odamlarni daromadli qilish.

Shoiraxon SHAMATOVA,
Savdo-sanoat palatasi Sayxunobod tuman bo'limi rahbari

HAR BIR MAHALLANING O'Z DRAYVERI BOR

Tomorqa va issiqxonachilik Sayxunobod tajribasining bir qismi, xolos. Tashabbus ortidan mahallalarda ixtisoslashuv, ya'ni odamlarning qiziqish va imkoniyatlaridan kelib chiqqan drayverlarni belgilab olib, rivojlantirish ham jadallashdi. Masalan, Paxtakor mahallasi uzumchilikka, Nurli yo'l mahallasi issiqxonaga, O'rikzor va Yangi hayot mahallalari baliqchilikka ixtisoslashtirildi. Tumanda tarmoqlar ko'paydi, uy sanoati rivojlandi. Odamlar bir-biridan o'rganib, havas qilib yangi loyihalarga qo'l urmoqda. Tajriba nafasi ko'pchilikni uyg'otgani rost.

O'rikzor mahallasida istiqomat qiladigan Qobuljon Sattorqulov baliqchilikka qiziq boshlagach, kitoblar, internet manbalari orqali yo'nalishning sir-asrorini o'rgandi. O'tgan yilning boshida ozgina to'plagan mablag'i hisobidan quruq yerga basseynlar qurishni boshladi ham. Endi ishni yurguzib yuborish uchun yordam kerak. Davlatimiz rahbarining Sayxunoboda tashrifidan so'ng bu masala birdaniga yechimini topdi. Hokim yordamchisining o'zi Qobuljon akaning xonadoniga kelib, kredit olishni taklif qildi. Qisqa vaqtda 100 million so'm imtiyozli kredit ajratildi. Bu mablag' evaziga chala qolgan ishlar tugallanib, may oyida 10 ta sun'iy suv havzasiga 10 ming dona Afrika laqqasi chovog'i tashlandi. U kasallikka chidamli, muhitga tez moslashadi, asosiysi, kichkina joyda

ham ko'p yetishtira bo'ladi. Yetishtirish davomida tashlangan chovog'ning 30 foizi yo'qolgan taqdirda ham, daromad o'zini oqlaydi. Masalan, baliq chovog'ining donasi 1000 so'mdan bo'lsa, tayyor baliqning kilosi bozorda o'rta 20 ming so'mdan sotilganda ham kichik basseynlardan 50-60 million so'm topsa bo'ladi. Baliqchilik daromadli yo'nalish, faqat parvarishni to'g'ri va o'z vaqtida olib borish kerak. Hamma ishda ham bilim va mehr bilan yondashilsa, natijasi ko'rinadi. Fuqaro keyinchalik sazani, osov'ot baliqlarini yetishtirish niyati ham bor. Baliqlar uchun zarur yemni xonadonida ishlab chiqarishni rejalashtirgan.

Umuman, tuman ahli mahsulot yetishtirishda anchagina tajriba to'playapti. Yaqin yillarda ana shu mahsulotni qayta ishlaydigan korxonalar, zavodlarga ehtiyoj ortadi. Tumanga allaqachon kichik ishlab chiqarishlar kirib kelgan. Ular, o'z navbatida, katta quvvatlar, sanoat rivojiga yo'l ochib berdi. Shu vaqtgacha bo'sh turgan ko'plab binolar birin-ketin ishga tushirilmog'da.

Gap shundaki, bu binolarga avval imtiyozlar bo'lmagan. Davlatimiz rahbari tashrif davomida ana shu bo'sh turgan bino-inshootlarning narxlarini tushirib, imtiyozlar qo'llash to'plashini berdi. Shundan so'ng tumanga investorlar oqib kela boshladi. Aholi o'z mahallasiga investor kelib, katta korxonalar qurishini tasavvur ham qila olmag'an. Bugun esa shularga o'zi guvoh bo'lyapti. Yangi hayot mahallasida afg'onistonlik investorlar

tomonidan qurilayotgan parrandachilik kompleksida 100 nafar ish o'rni yaratiladi. Tuman mahallasidagi yillar davomida bo'sh turgan tashlandiq bino ham yaqinda katta ishlab chiqarish korxonasiga aylanadi. Hududda yetishtirilgan mahsulotlar sotib olinib, shu yerda qayta ishlanadi. Tumanda shu kungacha 3 ta parrandachilik kompleksi ham tashkil etildi, yana bittasi ishga tushish arafasida. Bunday quvvatlarning yaratilishi Sayxunobod tajribasining ikkinchi qismi deyish mumkin.

Bu tajriba shunchaki tilda aytilayotgan tashabbus emas. Odamlar undan qanchalik to'g'ri foydalana olayotgani muhim, albatta. Ammo yanada muhimi shundaki, Sayxunobod tajribasi bitta tuman misolida butun mamlakatimiz aholisining farovonligini oshirish, imkoniyatlaridan kengroq foydalanish, o'zgarishlar nafasi har bir xonadonga kirib borishini ta'minlashga qaratilgan. Bu ezgu g'oya ortida odamlarimiz to'kin yashasin, kambag'allik bo'lmasin, har bir oila tadbirkorga aylansin degan maqsadlar mujassam. O'ta og'ir ahvoldan asta-sekin chiqib, rivojlanish tomon harakatlanayotgan Sayxunobod tumani va bo'sh o'tirmayotgan shu yerlik aholi buning yaqqol misoliga aylanmog'da.

Tohir JAVLONOV,
O'zbekiston mahallalar uyushmasi Sayxunobod tuman bo'limi boshlig'i

USHBU MAQOLANI QORAQALPOQ TILIDA HAM O'QISH UCHUN QR-KODNI SKANER QILING!



FAQAT HARAKAT QILISH ZARUR

Sayxunobod tajribasi ortidan tuman ahli tomorqadan unumli foydalanishning hadisini oldi. Bugun ularning aksari yilda bir necha marotaba hosil yig'ishtirib, yaxshigina daromad topyapti. Kimlar uchun bu qo'shimcha mablag' manbaiga aylangan bo'lsa, boshqalar agrotadbirkor darajasigacha chiqa oldi.

Masalan, hovlimizda 10 sotix tomorqa maydoni bor. Shundan 4 sotixdagi kichik issiqxonada sabzi yetishtiramiz. Avval issiqxonamiz kichikroq edi, davlatimiz rahbarining tumanga tashrifidan keyin bankdan kredit olib, kengaytirdik. Shu joyning o'zidan yilda ikki marta hosil olaman. May oyi oxirlarida sabzini yig'ishtirib, makkajo'xori ekamiz. Tomorqaning ochiq maydoniga bahorga yaqin kartoshka urug'i qadalladi. Tomorqa qo'shimcha daromad manbai. O'zimiz bozorda savdo qilaman, kichik do'konimiz ham bor, ammo mahalla ichida savdo biroz sust bo'lgani sababli to'xtab turibdi.

Oilada yagona boquvchiman. Otam kasallik sabab 9 oydan beri to'shakka mixlangan. Onam keksayib qolgan,

dalada ishlashga qiyinaladi. Bolalarim esa hali kichkina. O'zimiz o'rta-maksus ta'limni tamomlab, bir muddat maktabda jismoniy tarbiya fanidan dars berdim. Oylik maosh bilan ro'zg'orni tebratishga qiyinalib, o'zimizni bozorga urdim. Tomorqa qo'shimcha daromad manbai, yanada ko'proq foyda olishimiz mumkin, ammo unda ishladigan odam yo'q. Shu bois, olgan kreditimizni to'lashga qiyinalib qoldik. Ammo nolimayman, "Xudo beraman desa, dehqonchilik bir yilda", faqat harakat qilish kerak.

Umidjon XUDOYBERDIYEV,
"Olg'abos" MFY fuqarosi



Kun davomida Sayxunobod bo'ylab qator mahallalarni aylandik. Yo'llarning ancha ta'mirlanibligidan biroz shikoyat qilgan ham bo'ldik. Mavsumdagi yog'ingarchiliklar yo'llardagi notekislikni yanada yaqqolroq ko'rsatib qo'ygandek. Ammo xonadonlarda tomorqalar to'liq qishki "uyqu"ga ketmagan. Ba'zi issiqxonalarda mahsulotlar pishib turgan bo'lsa, ayrimlari ko'chatlar ekilib, parvarishlanayapti. Aholining aksari tomorqasini yanada kengaytirishga talabgorligini ko'rdik. Odamlar dehqonchilik, tomorqa va issiqxonaga avvaldek hafsalasizlik bilan emas, balki daromad manbai sifatida qarayapti. Oddiy insonlar qisqa vaqtda tadbirkorga aylanayotganiga tuman aholining o'zi yaqqol misol. Shubhasiz, bu tajriba yaqin yillarda yurtimiz bo'ylab keng ommalashadi.

Hamrohimiz Tohir akaga "Tumanda tadbirkorlarning ko'payotgani yaxshi, daromad ortadi, mana shu yo'llarni ham tekislashga hissa qo'shadi", deb ezgu niyat bildirdik.

Qo'sh sahifani "Yangi O'zbekiston" muxbiri Iroda TOSHMATOVA tayyorladi.

